


唐
•
宗密圭峰大師述

圓

覺
經

略疏



蘇州圖書館藏書章

圓覺經疏

江苏工业学院图书馆
藏书章

持受誦讀及資出為普
曰偈向迴者通轉輾

歡
迎
翻
印

功
德
無
量

法界諸含識	風雨常調順	現眷咸安樂	讀誦受持人	悉皆盡滅除	所有刀兵劫	增長諸福慧	願以此功德
同證無上道	人民悉康寧	先亡獲超昇	輾轉流通者	人各習禮讓	及與飢饉等	圓成勝善根	消除宿現業

免
費
贈
閱

嚴
禁
販
售

圓覺經疏略



著述/唐·宗密圭峰大師

出版/社團法人高雄市淨宗學會

製作/高雄淨宗學會編輯組

地址/高雄市鹽埕區七賢三路236號

電話/(07)521-9988

郵撥/41635731

戶名/高雄市淨宗學會

贈送處/高雄淨宗學會 七賢三路236號

淨空法師專集有聲版網址/

<http://www.amtb.org.tw>

<http://www.chinkung.org>

2006年3月 印贈1000本

大方廣圓覺修多羅了義經略疏序

金紫光祿大夫守中書侍郎尚書門下平章事充集賢殿大學士裴休撰

夫血氣之屬必有知。凡有知者必同體。所謂
眞淨明妙。虛徹靈通。卓然而獨存者也。是衆生
之本源。故曰心地。是諸佛之所得。故曰菩提。
交徹融攝。故曰法界。寂靜常樂。故曰涅槃。不
濁不漏。故曰清淨。不妄不變。故曰眞如。離過
絕非。故曰佛性。護善遮惡。故曰總持。隱覆含
攝。故曰如來藏。超越玄閼。故曰密嚴國。統衆

德而大備。爍群昏而獨照。故曰圓覺。其實皆一心也。背之則凡。順之則聖。迷之則生死始。悟之則輪迴息。親而求之。則止觀定慧。推而廣之。則六度萬行。引而爲智。然後爲正智。依而爲因。然後爲正因。其實皆一法也。終日圓覺。而未嘗圓覺者。凡夫也。欲證圓覺。而未極圓覺者。菩薩也。具足圓覺。而住持圓覺者。如來也。離圓覺。無六道。捨圓覺。無三乘。非圓覺。無如來。泯圓覺。無眞法。其實皆一道也。三世諸佛

之所證。蓋證此也。如來爲一大事出現。蓋爲此也。三藏十二部。一切修多羅。蓋詮此也。然如來垂教。指法有顯密。立義有廣略。乘時有先後。當機有深淺。非上根圓智。其孰能大通之。故如來於光明藏。與十二大士。密說而顯演。潛通而廣被。以印定其法。爲一切經之宗也。圭峰禪師。得法於荷澤嫡孫。南印上足道圓和尚。一日隨衆僧齋於州民任灌家。居下位。以次受經。遇圓覺了義。卷末終軸。感悟流涕。歸以所悟告

其師。師撫之曰。汝當大弘圓頓之教。此經諸佛授汝耳。禪師既佩南宗密印。受圓覺懸記。於是閱大藏經律。通唯識。起信等論。然後頓轡於華嚴法界。宴坐於圓覺妙場。究一雨之所霑。窮五教之殊致。乃爲之疏解。凡大疏三卷。大鈔十三卷。略疏兩卷。小鈔六卷。道場修證儀一十八卷。並行於世。其敍教也圓。其見法也徹。其釋義也端如析薪。其入觀也明若秉燭。其辭也極於理而已不虛騁。其文也扶於教而已不苟飾。

不以其所長病人。故無排斥之說。不以其未至蓋人。故無胸臆之論。蕩蕩然。實十二部經之眼目。三十五祖之骨髓。生靈之大本。三世之達道。後世雖有作者。不能過矣。其四依之一乎。或淨土之親聞乎。何盡其義昧如此也。或曰。道無形。視者莫能覩。道無方。行者莫能至。況文字乎。在性之而已。豈區區數萬言而可詮之哉。對曰。噫。是不足以語道也。前不云乎。統衆德而大備。燦群昏而獨照者圓覺也。蓋圓覺能出

一切法。一切法未嘗離圓覺。今夫經律論三藏之文。傳於中國者五千餘卷。其所詮者何也。戒定慧而已。修戒定慧而求者何也。圓覺而已。圓覺一法也。張萬行而求之者何。衆生之根器異也。然則大藏皆圓覺之經。此疏乃大藏之疏也。羅五千軸之文。而以數卷之疏通之。豈不至簡哉。何言其繁也。及其斷言語之道。息思想之心。忘能所。滅影像。然後爲得也。固不在詮表耳。嗚呼。生靈之所以往來者。六道也。鬼神沈

幽愁之苦。鳥獸懷獮狝之悲。修羅多瞋。諸天正樂。可以整心慮。趣菩提。唯人道爲能耳。人而不爲。吾末如之何也已矣。休。常遊禪師之間域。受禪師之顯訣。無以自效。輒直讚其法而普告大衆耳。其他備乎本序云。

大方廣圓覺修多羅了義經畧疏自序

唐終南山草堂寺沙門宗密撰

元亨利貞。乾之德也。始於一氣。常樂我淨。
佛之德也。本乎一心。專一氣而致柔。修一心而
成道。心也者。冲虛妙粹。炳煥靈明。無去無來。
冥通三際。非中非外。洞徹十方。不滅不生。豈
四山之可害。離性離相。奚五色之能盲。處生死
流。驪珠獨耀於滄海。踞涅槃岸。桂輪孤朗於碧
天。大矣哉。萬法資始也。萬法虛偽。緣會而生。

生法本無。一切唯識。識如幻夢。但是一心。心寂而知。目之圓覺。彌滿清淨。中不容他。故德用無邊。皆同一性。性起爲相。境智歷然。相得性融。身心廓爾。方之海印。越彼太虛。恢恢焉。晃晃焉。迴出思議之表也。我佛證此。愍物迷之。再歎奇哉。三思大事。既全十力。能摧樹下魔軍。爰起四心。欲示宅中寶藏。然迷頭捨父。悟有易難。故仙苑覺場。教興頓漸。漸設五時之異。空有迭彰。頓無二諦之殊。幽靈絕待。今此經

者。頓之類歟。故如來入寂光土。凡聖一源。現受用身。主伴同會。曼殊大士。創問本起之因。薄伽至尊。首提究竟之果。照斯真體。滅彼夢形。知無我人。誰受輪轉。種種幻化。生於覺心。幻盡覺圓。心通法徧。心本是佛。由念起而漂沈。岸實不移。因舟行而驚驟。頓除妄宰。空不生華。漸竭愛源。金無重鑛。理絕修證。智似階差。覺前前非。名後後位。況妄忘起滅。德等圓明者焉。然出廐良駒。已搖鞭影。埋塵大寶。須

設治方。故三觀澄明。真假俱入。諸輪綺互。單
複圓修。四相潛神。非覺違拒。四病出體。心華
發明。復令長中下期。克念攝念而加行。別徧互
習。業障惑障而消亡。成就慧身。靜極覺徧。百
千世界。佛境現前。是以聞五種名。超剎寶施
福。說半偈義。勝河沙小乘。實由無法不持。無
機不被者也。噫。巴歌和衆。似量騰於猿心。雪
曲應稀。了義匿於龍藏。宗密髻專魯誥。冠討竺
墳。俱溺筌弔。唯味糟粕。幸於涪上。鍼芥相投。

禪遇南宗。教逢斯典。一言之下。心地開通。一軸之中。義天朗耀。頃以道非常道。諸行無常。今知心是佛心。定當作佛。然佛稱種智。修假多聞。故復行詣百城。坐探群籍。講雖濫泰。學且師安。叨沐猶吾之納。謬當真子之印。再逢親友。彌感佛恩。久慨孤貧。將陳法施。採集般若。綸貫華嚴。提挈毗尼。發明唯識。然醫方萬品。宜選對治。海寶千般。先求如意。觀夫文富義博。誠讓雜華。指體投機。無偕圓覺。故參詳諸

論。反復百家。以利其器。方爲疏解。冥心聖旨。
極思研精。義備性相。禪兼頓漸。勒成三卷。以
傳強學。然上中下品。根欲性殊。今將法彼曲
成。從其易簡。更搜精要。直註本經。庶即事即
心。日益日損者矣。

圭峰定慧禪師遙稟清涼國師書

宗密慶以天幸。竊稟

和尚華嚴疏文。雖乖禮足。且解生焉。宗密恨以累有事故。不獲早赴起居。下情伏增惶懼。旣未繫目。敢自陳心。若不麤述本緣。甯表誠素。欲書實語。恐塵瀆視聽。進退無已。伏惟照恕。幸甚。宗密本巴江一賤士。志好道而不好藝。縱游藝而必欲根乎道。自齠年。洎弱冠。雖則詩書是業。每覺無歸。而復傍求釋宗。薄似有寄。決知